



Mobing – Incumbensas e purschidas dal Servetsch psicologic da scola

Tge è mobing?

Sut mobing vegn chapì in cumportament fisic u psychic agressiv che sa drizza systematicamain e repetidamain durant ina perioda pli lunga cunter ina persuna u cunter ina gruppa da persunas. Mobing è in'acziun da gruppa che ha l'intent d'excluder e d'umiliar las scolaras ed ils scolars pertutgads. Mobing po avair bleras differentas furmas: smanatschas, violenza corporalas, derasaziun da famas, privaziun d'infurmaziuns, offensius en las raits socialas ed auter pli. Tipic è il dischequiber da pussanza tranter las persunas partecipadas.

Rolla dal Servetsch psicologic da scola

Il Servetsch psicologic da scola (SPS) infurmescha e cusseglija sco post neutral geniturs, scolaras e scolars, persunas d'instrucziun, direcziuns da scola sco er autras persunas spezialisadas en cas da mobing. Il proceder concret sa drizza tenor la situaziun actuala, tenor ils giavischs dals uffants, dals giuvenils e da las persunas creschidas sco er tenor las resursas avant maun. Impurtantas èn en quest connex l'interdependenza e la collavuraziun da tut las persunas pertutgadas. Las reglas da la convivenza en scola e las consequenzas en cas da cuntravenziuns vegnan definidas e pronunziadas da la scola.

Purschidas

- **Intermediaziun d'infurmaziuns generalas / giudicament da la situaziun**

Sch'i dat in suspect ch'i saja avant maun ina situaziun da mobing, en cas da renfatschas da mobing u en cas da la malsegirezza da valitar ina situaziun en connex cun la dumonda da mobing, sa recumondi da contactar il SPS per telefon. En in discurs po vegnir fatga in'emprima valitaziun da la situaziun. Modas pussaivlas da proceder pon vegnir ponderadas cuminaivlamain e pussaivladads d'agir pon vegnir discutadas.

- **Cussegliaziun ed accumpagnament d'uffants e da famiglias**

Il SPS porscha accumpagnament e cussegliaziun per uffants e per giuvenils pertutgads e per lur geniturs. En la pli gronda part dals cas decidan ils geniturs e l'uffant ensemen cun las persunas d'instrucziun en in discurs, sch'il SPS duai vegnir integrà u betg. L'annunzia po vegnir fatga per telefon u en scrit directamain dals geniturs u da las persunas d'instrucziun.

En il center stat il stadi psychic da la scolara u dal scolar sco er la chapientscha da la situaziun sociala en la classa. La finamira da l'accumpagnament è quella da rinforzar l'uffant en l'ir enturn cun las pretensiuns.

- **Cussegliaziun da la scola / classa**

Il SPS fa propostas concernent strategias da proceder adattadas (metodas, mesiras, tenutas) sco er concernent l'integraziun d'ulteriurs posts spezialisads. En cas d'ina eventuala intervenziun en classa vegni adina ponderà bain ordavant, tgi che vegn a far questa intervenziun cura ed en tge furma. En quest connex po il SPS porscher sustegn en furma d'ina cussegliaziun u er surpigliar activamain ina rolla.

Contact / links

La persuna da contact è mintgamai la psicologa regiunala da scola u il psicolog regiunal da scola.

<https://www.gr.ch/RM/instituziuns/administraziun/ekud/avs/surdanus/persunasdacontact/Seiten/SchulpsychologischerDienst.aspx>

Documents complementars davart il tema cybermobing stattan er a disposiziun sin la pagina d'internet dal SPS: <https://www.gr.ch/RM/instituziuns/administraziun/ekud/avs/servetsch/Seiten/Unterlagen.aspx>